

Izjava OHR-a na konferenciji za medije međunarodnih organizacija

OHR prenosi ovlasti na domaće vlasti

Danas su načelnici općina Žepče i Gornji Vakuf – Uskoplje obaviješteni o odluci visokog predstavnika da okonča režim međunarodne supervizije u njihovim općinama.

Visoki predstavnik je istaknuo da je OHR u nekoliko proteklih godina radio na boljoj integraciji i dobrom funkcioniranju ovih nekada podijeljenih općina. Režim supervizije uspostavljen u Žepču 2000. godine i u Gornjem Vakufu – Uskoplju 2001. godine pomogao je objema općinama da učine značajan napredak u zastupanju svih građana i boljem vršenju funkcija vlasti. S obzirom na to, došlo je vrijeme da se i stvarna i formalna odgovornost za efikasno vršenje funkcija vlasti u oba ova grada prenese na domaće vlasti.

“Glavni cilj je bio ujedinjenje podijeljenih općina, demontiranje paralelnih administrativnih struktura i ujedinjavanje svih javnih službi i ostalih javnih preduzeća u obje ove općine. U protekle tri godine ovaj cilj je u velikoj mjeri postignut,” rekao je visoki predstavnik.

Više pojedinosti možete pronaći u saopćenju za medije koje možete dobiti na izlazu.

Danas se održava sjednica Vijeća ministara

OHR pozdravlja održavanje sjednice Vijeća ministara. Pred Vijećem ministara stoji veliki posao. Treba usvojiti još sedam zakona i poslati ih u Parlament na usvajanje ako BiH želi ispuniti zahtjeve iz Studije izvodljivosti Evropske komisije. Među tim zakonima je i Zakon o javnom RTV sistemu o kojem

treba raspravljati i usvojiti ga na današnjoj sjednici. Posebno skrećem pažnju na ovaj zakon jer će on omogućiti stvaranje finansijski i urednički neovisnog javnog RTV sistema, što će omogućiti bolje korištenje javnih sredstava. Još jedan zakon koji čeka na usvajanje od strane Vijeća ministara je Zakon o konkurenciji koji predstavlja ključni element u stvaranju poslovne klime u BiH koja će privući investitore koji će otvoriti nova radna mjesta.

Vijeće ministara se sada mora posvetiti svojim osnovnim zadacima – pisanju zakona, raspravom o njima i slanjem u Parlament. Samo na taj način ono može pozitivno utjecati na život svojih građana.

Govor visokog predstavnika o toleranciji

Visoki predstavnik Paddy Ashdown će večeras govoriti na otvaranju izložbe o toleranciji u Zemaljskom muzeju. Izložbu organiziraju Vijeće Evrope i niz drugih organizacija, među kojima su Zemaljski muzej, akademije likovnih umjetnosti iz Banje Luke i Sarajeva i sarajevski Arhitektonski fakultet. Izložbu će otvoriti premijer Terzić.

U svome obraćanju visoki predstavnik će se fokusirati na dugu tradiciju tolerancije u Bosni i Hercegovini, koja je u većem dijelu istorije ove zemlje predstavljala pravilo, a ne izuzetak. To je tradicija iz koje druge evropske zemlje imaju šta naučiti.

Donio sam primjerke govora. Kao i obično, obratite pažnju na moguće promjene u govoru koji će biti održan.

Visoki predstavnik će se sastati s glavnom tužiteljicom Haaškog tribunala

Kao što vam je vjerovatno poznato, visoki predstavnik će se danas kasno popodne sastati sa glavnom tužiteljicom Haaškog tribunala Carlom del Ponte. Planirano je kratko obraćanje medijima, a u narednih sat vremena bismo trebali objaviti kada

će to tačno biti.